

EPISTOLĀ¹⁰
PASTORALIS
AD CLERUM 13
ET POPULUM PATAVINUM.



Revisum et Correctum P. Buoncompagni de Urbe

ROMAE

APUD JOANNEM MARIAM SALVIONI
Typographum PONTIFICIUM VATICANUM.

ANNO DOMINI M D CC XLIII.

SUPERIORUM PERMISSU.

C A R O L U S

S. NICOLAI IN CARCERE TULLIANO DIACONUS

S. R. E. C A R D I N A L I S

R E Z Z O N I C U S

Miseratione Divina

EPISCOPUS PATAVINUS

ET COMES SACENSIS &c.



Venerabilibus Fratribus, dilectissimis Filiis, Capitulo, Clero, Populoque suo salutem in Domino sempiternam.



Impositum nobis Pastoralis servitutis onus, VENERABILES FRATRES, DILECTISSIMI FILII, non minus inviti, quam immerentes, Deo sic jubente, suscepimus. Quanto id animi nostri timore, atque tremore contigerit, cum satis abunde vobis, ipso rumore publico nun-

ciente, compertum sit, non est quod pluribus
 nunc exponamus. Placuit Divinæ bonitati,
 cui proprium est infirma Mundi eligere, nos
 ad munus sua amplitudine gravissimum, at-
 que verendum evocare; ut magis elucerent
 mirabilia ejus. Et sane, qui totam rerum,
 gestarum rationem perpenderit, nostræ humi-
 litatis exaltationem inter præclara opera dex-
 teræ Excelsi recensere non dubitabit. Primum
 quidem animo concidimus (licet in eo confisi,
 qui sperantes in se confundi non patitur), quo-
 niam vix, consequuta electione, statim novimus,
 venisse nos in altitudinem maris. Sed Clemen-
 tissimus Deus, in ipso Pontificalis Consecratio-
 nis limine, nos oleo suæ unctionis aliquantulum
 recreavit. Quare, ut, nulla interposita mora, Vo-
 bis misericordias Domini denunciemus, scire
 Vos volumus, **VENERABILES FRATRES,**
DILECTISSIMI FILII, illucescente die, Sancto
 Josepho Sponso intemeratæ Virginis Mariæ
 consecrato, mirificam animi nostri factam fuisse
 conversionem: & novam rerum faciem emer-
 sisse, cum nos, nullo licet meritorum suffragio,
 speculatores facti Patavinæ Domûs Israhel, in
 mentem revocavimus, **BENEDICTUM XIV.**
 Pontificem Optimum, Maximum, virtute indu-
 tum ex alto, Apostolicas manus trepidis nostris
 cervicibus imposuisse, & mysticis Charismatibus
 roborasse; ut, quod nostro gerendum est ministe-
 rio, fortiter, viriliterque divina ope exequere-
 mur.

mur. Oravit Sacerdos Magnus pro nobis Spiritum Paracletum, ut Cælestis unguenti fluor copiose in nostrum caput influeret, atque, in oris subjecta decurrens, ad totius corporis extrema descenderet. Oravit, ut Spiritus fortitudinis interiora nostra repleret, atque exteriora circumtegendo protegeret. Oravit denique, ut abundaret in nobis constantia fidei, puritas dilectionis, sinceritas pacis. Quare, post crebra illa ex imo corde suspiria, quæ antea ingenti pavore correpti profundeabamus, humiliantes nos demum sub potenti manu Dei, ejusque in Terris Vicario obsecundantes, Davidicum illud coram Domino recolimus, *obmutui, & non aperui os meum, quoniam tu fecisti*. Speramus itaque adfuturum esse Deum, ut impositum nobis per ineffabilem suæ bonitatis abundantiam ministerium animarum, sancte, & juste, ac pie adimpleamus; demusque operam omni studio, & conatu, ut nostra villicatio sedulo peragatur, nulumque Vineæ detrimentum irrogetur.

Quare nunc Vobis VENERABILIBUS FRATRIBUS, DILECTIS FILIIS PRESBYTERIS, DIACONIBUS, SUBDIACONIBUS, UNIVERSOQUE CLERO, ET PLEBI SANCTÆ DEI, Præcessorum nostrorum vestigiis inhærentes, per hanc Epistolam significamus humilitatis nostræ Missionem ad vos; ut allaboremus vobiscum diu, noctuque sine intermissione. Omnibus ergo precibus Dominum exoramus,

exoramus, ut vos quoque, qui in partem sollicitudinis nostræ vocati estis, vestram laborum partem sustineatis; exhibentes, sicut Apostolus admonet, & sicut, miserante Domino, facere consuevistis, vosmetipsos exemplum bonorum operum in omni sanctitate. Sed primum, Capitulum, & Canonicos alloquamur.

Gaudium, & corona nostra quoniam estis Vos, sublimem, ac præclarum locum, quem in Cathedralis Ecclesiæ subselliis obtinetis, eximiarum virtutum splendore illustrare pergite; ut ita singularis illa, atque exultabunda lætitia, quam, sicut scribitis, ex nostra Electione suscepistis, oriatur etiam in nobis, & crescat magis in dies, ob egregiam pietatem vestram, ex qua, læta omnia speramus. Vestri muneris est nobis assistere; nosque ab onere sublevare, ut ministerium, quod accepimus a Domino Jesu Christo, fideliter compleamus. Opera, consilioque vestro, ad quæque peragenda, libentissime utemur: ac Fraternitatum vestrarum numerum semper intimo nostri cordis affectu prosequemur; rogantes pro eodem jugiter Deum Optimum Maximum, ut, cum prospera, ac diuturna incolumitate, ad plures annos integer perseveret. Cavete; ne disciplinæ Canonice ulla infligatis vulnera; mutuam animorum, voluntatumque concordiam fovete; & ambulate in omni justitia, & sanctitate; ne exprobrari vobis possit effatum illud S. Bernardi ad Eugenium,

nium, *vides omnem Ecclesiasticum zelum fervere sola pro Dignitate tuenda. Honori totum datur, sanctitati nihil, aut parum.* Ponite ergo Vobis ob oculos institutum, quod profitemini; personam, quam sustinetis; vestem, quam induistis. Arripitethuribulum, hoc est preces Sanctorum, & Deum Optimum Maximum (qui est multæ misericordiæ omnibus invocantibus eum) jugiter exorate; ut nobis adesse velit ex alto, & gravissimum infirmitati nostræ impositum onus cælesti gratia sua, & opera vestra levare non prætermittat. Obsecrate eum, ut nos confirmet potentia virtutis suæ; effundatque super nos Spiritum consilii, & fortitudinis; ut, & quæ agenda sunt, videamus, & ad implenda, quæ viderimus, animus convalescat. Non deerit certe nobis, si nos officium nostrum impleverimus, si vos vestro non defueritis.

Sed jam excurrat Epistola ad salutandos vos Pastores animarum, quos Deus posuit custodes nobiscum super muros Jerusalem. Amplectimur vos expansis brachiis Paternæ dilectionis, & deprecamur in visceribus Jesu Christi, ut solliciti sitis pro instantia vestra quotidiana, sollicitudine scilicet Parochiarum. Muneris vestri debito fidelissime consuletis, si caritas urgebit, & impellet vos; si erunt pedes vestri, pedes Evangelizantium pacem, Evangelizantium bona; si nihil aliud quæretis, quam

quam gloriam Dei , & salutem animarum ; si denique sollicitudinem nostram jugibus laboribus sublevabitis , sicut vestra perspecta pietas , atque religio abunde nobis pollicentur . Agite ergo , & , ad infirmitates spiritales , quibus concreditæ vobis oves obnoxia reperientur , medicas manus adhibentes , pastoralis vigilantia studii , eas , si erraverint , in viam Divinorum mandatorum reducite : & caritate , quæ foras mittit timorem , arguite , obsecrate , & increpate eas , opportune , importune , in omni patientia , & doctrina ; pluries , suadente justitiâ , asperiora quæque aggrediendo ; pluries , monente pietate , mitiora amplexando consilia ; pluries demum , cogente obdurata malitia , Paternas manus extendendo ad virgam correctionis : nihil curantes interea , quomodo vestram hanc agendi rationem homines hujus seculi interpretentur . Probe nostis , æquè *per infamiam , & bonam famam* serviendum esse Deo , nullumque laborem recusandum ; ut morum reformatio feliciter promoveatur . Hanc igitur rem , non minus arduam , quam salutarem , majori semper conatu urgere vobis mandamus . Vitia deplorare non sufficit , nisi ea pro viribus etiam emendare studeamus . Nos certe omni cura , omnique animi contentione dabimus operam , ut nullum vobis periculum inde exoriatur .

Paternum Episcoporum animum pulsat maxime incititia Legis Dei : quare nos vobis
etiam

etiam, atque etiam inculcamus, ut omni industria, atque solertia Catholicæ Fidei, morumque Christianorum principiis pueros imbuatis; quibus ipsi, quasi lacte nutriti, solido postea cibo, omniumque virtutum incrementis augeantur. Ita in eis, cum ætate, Religio etiam, & pietas adolescet. Vobis ergo id maxime cordi sit; quoniam, si ipsi ab adolescentia aures præbere assuescent verbo Dei, cujus declaratio illuminat, & intellectum dat parvulis, sique vestra caritate allicientur; pro ea, qua præditi sunt animorum docilitate, pronis studiis voluntati vestræ obsecundabunt. Hæc cum præstaveritis, nos pro tanto animarum regendarum numero salutari timore perculos mire consolabimini; & gratias agemus Patri misericordiarum, qui, dum elevans, allisit nos, fecit immenso oneri, quod subimus, supponere manus vestras, ut gloriaremur in vobis, & faceremus ex ipsa nostra infirmitate proventum.

Divinas Paginas, Sacrosanctum Concilium Tridentinum, Præcessorum nostrorum Decreta, familiares SS. Patrum, & præsertim Chrysostomi Conciones, Acta Mediolanensis Ecclesiæ Rectoribus animarum maxime utilia, & Sancti Caroli Borromæi spiritu plena, saniores morum Regulas, ex limpidissimis fontibus haustas, Romanum Catechismum, & Rituale Parochorum diurna, nocturnaque

manu versare vobis summopere commendamus, ut decet dispensatores mysteriorum Dei. Et, ne inimicus homo zizania in agro Dominico superseminare contendat, quæ bonas segetes suffocent, vos singulis diebus Festis inter Missarum solemnia visitate campos, sulcate glebas, eradicatæ germina vitiorum, & spargite semen, quod est verbum Dei.

Nobis semper sanctum, firmumque erit, ut viros doctrinâ, pietate, ac prudentiâ omnibus digniores in Parochos eligamus; unice prospicientes majori Dei gloriæ, & nostræ Ecclesiæ utilitatibus, absque acceptione Personarum; quoniam messis amplior, majorem in feligendis operariis sedulitatem exquirat.

Nullas etiam Pastoralis sollicitudinis partes omitemus, quò Clericos ad Altare Dei, per Sacrorum ordinum gradus, & juxta Ecclesiasticas regulas, legitime traducamus. Quare eosdem Clericos nostræ Ecclesiæ servitiis mancipatos instruimus, & admonemus, ut diebus Festis Parochis administrent, in Sacris se exerceant Ritibus, pietati, & literis vacent, a ludis sæcularibus, nocturnisque conventibus se abstineant, atque in omnibus actibus suis nil, nisi sanctum, grave, modestum, ac religione plenum præferant. Eos vero, qui majoribus ordinibus initiati reperiuntur, & Divinis mysteriis propius accedunt, volumus etiam, ut habitu talari incedant; ut ita (verba sunt

Sacrofancti Concilii Tridentini) *per decentiam habitus extrinseci, morum honestatem intrinsecam ostendant, aliisque exemplo esse possint, sicut decet ministros mysteriorum Dei.*

Non patiemur absconditas esse sub modio lucernas illas, quæ super candelabrum collocari merebuntur; ut omnibus, qui in domo sunt, præluceant, & suarum fulgore virtutum Patavinum cælum illustrent. Clericis nostris, licet pauperculis, si bonus odor Christi erunt, Ordinationum, Beneficiorumque præmia non retardabimus; ut ita universi, qui bene se gerent in Divino famulatu, spei novæ stimulis magis accendantur. Econtra vero, Ecclesiæ nostræ rebus opem laturi, Clericorum catalogo ea nomina non adjungemus, quibus ejusdem Ecclesiæ rationibus minime consulatur. Quare in hanc rem, pro sanctiori disciplina urgenda, promovendaque, sicut ceteris Pastoribus animarum, ita potissimum nobis, qui florentissimo Clero præsumus, &, Sacræ Purpuræ dignitate, velut arctiore vinculo Ecclesiæ jungimur, omni adhibita sedulitate, ac diligentia erit elaborandum; ut nullus, patefactis Sanctuarii aditibus, admittatur ad obcunda munera Domus Dei, cui morum, ac literarum merita non suffragentur. Omnia ergo Venerabilis Viri Gregorii Cardinalis Barbadici saluberrima Constituta, quæ de Ecclesiasticis Ordinationibus, & morum, littera-

rumque promulgata sunt disciplinis, ita singulis custodienda mandamus, ut si quis illa contempserit, omnem spem sibi noverit amputari. Opportunis itaque scientiæ pietatisque subsidiis destituti, etiamsi in sortem Domini voluerint cooptari, quoniam muneris, ad quod se vocari credunt, debito bene nequeunt respondere, minime promovebuntur.

Nemo etiam honores, facultates, prærogativas, Officia, Beneficia, Ordinationes &c. consequi speret, qui, ut impetret, per interpositas Personas Nos commendationibus, atque supplicationibus sollicitaverit. Hanc præviam declarationem facere voluimus, ad hujusmodi perniciosissima officia penitus eliminanda; quam licet aleæ plenam prævideamus, quoniam subeunda nobis erunt odia adversus homines sæculi, qui gravia, & minime toleranda rebus Sacris, Ecclesiasticæ disciplinæ, ac spiritali regimini præjudicia inferre moliuntur, firmo tamen, fortique gradu pergemus ire, quo coepimus; animo recolentes, nihil ab Episcopis precibus peti oportere: preces enim apud eos, neque ad iusta impetranda necessariæ, neque ad iniusta extorquenda efficaces esse debent: & Canonici sanctionibus, eos, qui ita agunt, antiquis potius cadere, quam novis augeri honoribus debere constitutum est. Igitur, ad importunas hujusmodi commendationes, supplicationes, intercessionisque declinandas, semper memores eri-

mus illius juris jurandi, quod de bene administranda Ecclesia Patavina præstitimus; quodque, divina favente gratia, sancte, ac religiose usque ad extremum vitæ nostræ spiritum adimpleturos speramus. Quoniam vero hæc præcipua nostra sollicitudo jam evasit, ad Pastoralis officii debitum quammaxime pertinere censuimus de ea omnes commonere; ut compertum habeatur, neminem eorum, qui per interpositas Personas, Beneficia, Officia, Ordines &c. ope commendationum, & recommendationum exposcent, tam dissitum a cælo esse, quam ipse ab impetratione sit. Nemo igitur hujusce propositi, quod alta mente repositum manet, observantiam cludere studeat; nemo contemnere audeat: quoniam inania verba non damus; sed verba factis indubie respondebunt. Et sciant, nos in hunc finem non omisisse, non omittere, nec omisuros esse eas omnes obire partes, quibus spe omni destituantur hi, qui in ejusmodi commendationibus, officiisque confidunt. Deus Optimus Maximus consilia nostra Cælesti sua ope juvare, optatumque ad exitum perducere benigne velit; detque voci nostræ vocem virtutis, ut sapientiæ carnis, quæ inimica est Deo, Pastorale pectus obsistat.

Sed jam ad carissimos Clericos in Seminario degentes transeamus, eosque in visceribus Jesu Christi piis Rectoribus commendemus; ut ipsi sedulam curam de illis habeant, quorum

rum aliquando virtutibus Patavina Ecclesia erit illustranda. Nostram certe benemerentibus paternam dilectionem luculentis testimoniis Episcopalis largitatis comprobabimus; ut ita alacrius ad majora semper virtutum incrementa procedant, quæ cunctis demum læta esse possint, & utilia.

Sed Vos etiam, o Archigymnasii Patavini lumina, & Literariæ Palæstræ Clarissimi Præceptores, nostræ villicationis rationibus plurimum consuletis, si cura, & autoritate vestra dabitur operam, ut una cum Institutionibus bonarum Artium, & humanarum, Divinarumque rerum, solido quoque pietatis succo animi florentissimæ juventutis alantur, & imbuantur. Hoc si præstiteritis, Serenissimæ, & Religiosissimæ Nostræ Venetiarum Reipublicæ (numquam, ut confidimus in Domino, interitura) fiet ex vestro insigni Lyceo nova semper majoris amplitudinis, atque celebritatis accessio. Agite ergo, atque in eam rem potissimum semper incumbite, ut omnia in pace sint posita, & ne rixæ, contentiones, & scandala exoriantur. Probe novimus, id omni tempore Christianam Vestram sollicitudinem exercuisse, ex qua, etiam impræsentiarum, felicem, faustum, fortunatumque nostrorum votorum exitum ominamur. Magnificum sane, ac prorsus singulare Dei Optimi Maximi beneficium reputandum est, quod Patavina Ecclesia tanto gaudeat Athenæo; in quo,

quo , si jugi fœdere pietati literæ semper famulabuntur, hi, qui in sortem Domini vocandi erunt, capient ab ipsis literis majora incrementa virtutum; & ager Dominicus, nobis immerentibus traditus, fructus dabit uberiores in tempore suo.

Nunc autem, quoniam huic Epistolæ nostræ latius evaganti jam habenæ laxatæ sunt, ad Regulares Ordines reverendos digrediamur, qui, levantes se supra se, inconstantiam voluntatis humanæ in prodigium fortitudinis Votis, ac Professionibus converterunt. Hortamur ergo Vos in Domino, ut nihil agatis, nisi sanctum, nisi laudabile, nisi Fundatoribus vestris dignum; utque tutam Evangelicæ perfectionis viam, quam estis ingressi, alacriter persequamini; inhiantes Cælestis itineris termino; & paupertatem, labores, æumnas, vigilias, orationes, ac jejunia læto, fortique animo sustinentes: quoniam tot animorum, & corporum afflictationes, tantamque rerum terrenarum inopiam, uberrima Cælestium charismatum copia Deus totius consolationis vobis largiter compensabit. Velitis itaque semper in dies magis Divinorum consiliorum, mandatorumque viam alacriter currere, & sine ulla intermissione calcare; ut tandem accipiatis Cæleste bravium, ac regnetis cum Christo in perpetuas æternitates. Subditi estote ex animo Præpositis vestris; & nobis etiam, in his quæ attinent jure ad nos:

Episcopalia, & Parochialia jura facta testā servate : Confessiones excipientes, nostri examinis, cum libuerit, incunctanter periculum subitote : Conciones, sine nostra prævia delegatione, ad Populum non habetote.

Quod ad Sodalitates attinet Sæculares, eas scire volumus, ut animos jugiter inflamment suos ad ea tantum servitia in Domo Dei peragenda, quæ Ecclesiasticis institutis, ac Parochorum juribus præjudicia non inferant. Insignis pietas Populi Patavini ex votis omnia nobis eventura pollicetur.

Quare nunc convertemur ad vos, o electæ a Domino, desponsatæ Christo, Virgines sacrae, quæ voluistis servire Deo in omni castitate, magis quam habitare in tabernaculis hominum. Alta vobis construenda est turris Sanctitatis: quare ima jacite Religiosæ humilitatis fundamenta. Regnet in Monasteriis vestris jugis caritas, quæ patiens est, & benigna; quæ non emulatur, non inflatur, non irritatur; quæ omnia suffert, omnia credit, omnia sperat, omnia sustinet. Sit in vobis ardens meditationis, atque orationis studium, quo per arduum perfectionis tramitem ad superiora conscenditur. Fiat unaquæque vestrum sui abnegatione demissior, & divinarum rerum evadat contemplatione sublimior. Innocentia securioribus inclusa septis, sit inter alloquiorum pericula sanctissime custodita. Hominum cavete

cavete affatus : manete in vocatione , quæ vocatæ estis ; & præliamini bella Domini , ut insignes de humani generis hoste victorias reportetis . Sit in vobis Paupertas Regularis , Castitas admiranda , cæca Obedientia , profunda humilitas , contemplatio sublimis , conversatio Cælestis . Estote prudentes Virgines , quas Dominus in cubiculis semper vigilantes inveniat . Sumite oleum vobiscum Divini amoris , eoque refertas lampades vestras , usque ad occursum Sponsi , inextinctas gestate , omnium virtutum meritis , omnium charismatum donis prælucentes . Sine intermissione pro vobis , ac pro nobis etiam orate , ut consumemus cursum nostrum , & ministerium , quod accepimus a Domino Jesu Christo . Sed nimis longum esset ire per singulos : quare intimo Paterni cordis affectu universos nostræ sollicitudini commendatos insimul amplectemur , hortabimurque , ut vestigiis Divinorum mandatorum semper inhæreant , & ambulent in viis ejus .

Quoniam vero uniuscujusque Ecclesiæ peculiaris morum institutio , & sanctior disciplina in Episcopalibus Synodis , Constitutionibus , atque Decretis maxime quærenda est , nos , ut etiam in hoc genere nostræ Diœcesis utilitatibus pro viribus , favente Domino , consulamus , dabimus operam , ut , quæ a Præcessoribus nostris pie , ac sapienter ordinata sunt , in unum Corpus redigantur . Ab illis vero temporibus ,

quæ Sacrosanctum Concilium Tridentinum proxime consequuntur, hujusce Collectionis sumemus exordium; & alte, atque, ut oportet, a capite repetemus eam seriem Legum, quarum adhuc ea vis est, ut jubeant, & in vigore permaneant. Quid autem tam utile nostris hominibus in sortem Domini vocatis, quam isthaec Juris Ecclesiastici Patavini Collectio, a qua, post generales Regulas, haurienda erit a Plebibus norma totius vitæ, & sanctitatis. Habebunt in ea greges nostri aliquid uberius, quam Jus commune præscribat: & legentes tot fuorum Episcoporum Ecclesiastica Constituta, in quibus traditur Clero, & Plebi sanctæ Dei, quæ sint facienda, prohibenturque contraria, ignorantiam non allegabunt, quæ, universorum mater foecunda malorum, in Ecclesiasticis Personis, nec excusatione digna videbitur esse, nec venia, ipsisque non suffragabitur, ob hujusmodi Collectionem, quæ quasi officinam instruet sapientiæ. Ita nemo indemnis, & innoxius eas Leges amplius negliget, atque violando perrumpet, in quibus condendis, tot Præsules venerandi suas curas, & vigilias impenderunt, ut omnium mores ad normam Oecumenici Concilii Tridentini componerentur. Hæc potissimum causa nos impulit, ut Corpus tale condere, & ordinare meditaremur. Nam, cum nobis incumbat onus Ecclesiam Patavinam sanctissime gubernandi, magni æstimavimus inter-

interesse, si ad Cleri, & Populi nostri componendos mores, & semper in melius reformandos, tot salutaria, & Ecclesiastico succo plena Decreta uno Corpore continerentur; præsertim, quia eorum exempla, diversis temporibus promulgata, ut plurimum scriptoris tantum manibus, non autem Typographi prælo commissa, sunt: quod inobservantiam facile potest inducere. Itaque, cum Collectio prodibit, hortamur omnes, ad quos ratione, muneris, oneris, vel officii pertinebit, ut sæpe sæpius eam legant, ac meditentur. Legum patrociniū ita suscipiendum erit, ne Episcoporum interitu, Constitutiones etiam intereant.

Clementissimus Deus vota nostra pronis auribus dignetur excipere, & sua Cælesti benedictione complere. Quod, ut præstet, tenebimus quamprimum Aram S. Prosdodimi (Beatissimi Apostolorum Principis Discipuli, & Ecclesiæ nostræ primi Fundatoris); tenebimus ejus Confessionem; &, cum illo nobiscum orante post obitum, inde tendemus supplices ad Deum manus, rata ut habere velit ea, quæ nos per hanc Epistolam adhuc absentes vobis significamus. Interim etiam Vos, o VENERABILES FRATRES, DILECTI FILII, SS. Præcessorum nostrorum, Maximi, Fidentii, Syri, Leonii, Hilarii, Bernardi, & Bellini altaribus provoluti, eorum suffragiis intercedentibus, impetrate nobis auxilium ex alto. Hi sunt,

qui, post S. Prosdocimum, cum essent in hoc tabernaculo, suscitaverunt majores vestros in commotione; atque, in extirpandis, aut Ethnicæ superstitionis, aut vitiorum zizaniis, pretiosa, morte Sanctorum occumbentes, animas suas pro Domino profuderunt. Hi gravissimam causam juvent nostræ Legationis ad vos, in qua, cum vestra salute, nostræ quoque salutis ratio conjungitur.

Vinea est Ecclesia, quæ nisi opportunis, firmissimisque maceriis, ac sepibus muniatur; fures non deerunt, qui eam devastare minime perhorrescant. Quare nos nihil magis diu noctuque elaborabimus, quam ut ad ejus curam fideliter excubemus. Hac de causa, quando veniemus ad Vos, (veniemus autem brevi) universam Dioecesim sacra Visitatione lustrabimus; nec ulla locorum asperitas nostræ solitudinis cursum retardabit. Memores enim sumus illius mandati, quod Paulus intonat, dicens, *attendite vobis, & universo gregi, in quo vos Spiritus Sanctus posuit Episcopos regere Ecclesiam Dei, quam acquisivit sanguine suo.* Et illud terribile verbum Domini, quod factum est ad Ezechielem, nostris etiam auribus strepit: „Væ Pastoribus Israel, qui pascebant semetipsos; nonne greges a Pastoribus pascuntur? lac comedebatis, & lanis operiebamini, &, quod crassum erat, occidebatis, gregem autem meum non pascebatis. Quod infirmum fuit, non consolidastis; &, quod ægrotum, non sanastis; quod confra-

ctum, non alligastis; quod abjectum, non reduxistis; & quod perierat, non quæstistis: idcirco dispersæ sunt oves meæ, eo quod non custodiret, nec visitaret eas Pastor, & factæ sunt in devorationem omnium bestiarum agri, & dispersæ sunt. Erraverunt oves meæ in cunctis montibus, & in universo colle excelsio; & super omnem faciem terræ dispersi sunt greges mei, & non erat qui requireret. Audite propterea verbum meum Pastores; vivo ego, dicit Dominus, quia facti sunt greges mei in rapinam, & oves meæ in devorationem omnium bestiarum agri, eo quod non esset Pastor, qui, semetipsum tantum pascens, nec grægem meum quærens, nunquam sibi commissas oves pascebat, nec eas assidue, ut æquum erat, visitabat: idcirco Ego ipse super Pastores, de manu eorum grægem meum requiram, & cessare faciam eos, ut ultra non pascant armenta, nec pascant amplius semetipsos, & de eorum ore grægem meum liberabo, & non erit ultra eis in escam. „ Properabimus igitur, DILECTISSIMI; venire ad vos, sedulo exploraturi an ager noster Dominicus alicubi silvescat spinis, aut tribulis; an veternosæ in eo arbores reperiantur, quæ nullum alium fructum afferant, quam glandium, & filiquarum; an otiosa jaceat Parochorum securis; an exturbentur malæ bestię a terminis suis, ut greges securi, & tuti in pascua educantur; an plebes clericis, clerici

Sacerdotibus, Sacerdotes nobis subiecti sint: an demum quidpiam incultum inveniatur.

Cælestis Paterfamilias, qui profert de thesauris suis nova, & vetera, etiam in diebus nostris aliud novum exemplar ad Ecclesiam pie, ac sapienter administrandam nobis proposuit, Venerabilem nempe Gregorium S. R. E. Presbyterum Cardinalem Barbadicum, qui, non minus sanctimoniam, quam Pastoralis sollicitudinis luce, Patavinum Cælum illustravit. Quanta fecerit, & docuerit, quoniam satis superque vobis comperta sunt, & in nupera Ferdinandi Ughelli Editione * *Italiae Sacrae* leguntur, nos hic non recensemus. Ordines universi maxime in votis habent, ut ejus splendida merita totius Ecclesiae Venerationi tandem aliquando proponantur; ac, veluti super candelabrum collocata, luceant omnibus, qui in domo sunt, ad majorem Dei gloriam, & nostrae Ecclesiae praesidium, & decus singulare.

Quoniam vero ad novissima tempora jam accessimus, acerbissimum illum, ac vere luctuosum Joannis Minotti Ottoboni Praecessoris nostri obitum, quem maximo cordis vestri moerore nuper deflevistis, hic etiam commemoramus. Nul- lum sane vobis dubium esse potest, quin animos aequè nostros ingenti dolore affecerit gravis illa Patavinæ Ecclesiae jactura, cui aliquantulum farciendæ BENEDICTUS XIV. Pont. Max. & de universa Christiana Republica mul-

tis nominibus optime meritis, nostram imbecillitatem clementissime destinavit.

Cum primum licuerit, VENERABILES FRATRES, DILECTISSIMI FILII, celerime veniemus ad vos. Adventus autem noster ut bene vertat Ecclesiæ Patavinæ, precibus omnibus exorate gloriosissimos ejusdem Patronos, Justinam scilicet invictissimam Martyrem, & Antonium alterum Thaumaturgum, cujus memoria est in benedictione omnium Populorum. Ipsum etenim vere Sanctum, vere pauperem, vere humilem, vere Beati Francisci filium, non solum heroicarum virtutum meritis, sed etiam perennium, & illustrium miraculorum gloria præfulgentem, piis peregrinationibus omnes Christifideles venerantur. Divini verbi præconium, ita illius linguam Cælestibus inbuit aromatibus, ut ipsa, incorruptione quæfita, quasi cinnamomum, & balsamum aromatizans, & quasi myrrha electa, suavem reddat odorem immortalitatis. Ipsa ergo tam cara Deo, ab eodem impetret nobis largum Cælestis gratiæ, luminumque viaticum, ut dirigantur gressus nostri in viam salutis, & pacis.

Credimus quidem non sine peculiari Divinæ providentiæ consilio contigisse, ut nos desponsaremur Ecclesiæ, cujus insignis Cathedralis Domus, est in honorem B. Mariæ Virginis, Deo consecrata. Videtis enim atque perspicitis quanto nos auxilio Cæli Regina juva-

bit. Quamprimum itaque nos, adnuntiaturi una vobiscum in eadem Ecclesia laudes ejus in exultatione, cantabimus Canticum novum, quem ipsa cantavit Domino suo. Interim hanc Epistolam nostram solemnem ANNUNTIATIONIS ejus die volumus mittere ad vos, ut jugibus vestris apud Eam votis, & precationibus nobis occurratis, & Divinam bonitatem obsecretis, ut sua Cælesti ope adventui nostro benedicat ex alto. Id Vos facturos speramus. Quare, expansis nostri Pastoralis amoris brachiis, amplectimur unumquemque vestrum in osculo Sancto, oramusque, ut *Gratia Domini nostri Jesu Christi, & caritas Dei, & communicatio Sancti Spiritus sit cum omnibus vobis.*



Datum Romæ extra Portam Flaminiam, VIII. Kalendas Aprilis, Anno Domini MDCCXLIII.

401.02912

